



10601

滇雲歷年傳卷九

契臯老人倪蛻輯

曾孫慎樞梅岑恭校

起明神宗萬曆十三年盡崇禎十六年

明神宗冲年嗣位初政清明自十一年相國張居正歿後君德日損蓋不勝其驕逸貪惑之心也雲南邊鄙面世多膠於金縷作貢之說神宗於是加貢金開鑛場充閩紛來而西南民力困矣此皆十三年後事也相繫於天下顧不重哉

十三年乙酉六月昆明縣雨雹害稼

以平隴川功賜巡撫劉世曾一品服加侍郎銜兼督川

滇雲歷年傳

卷九

一

貴兵餉黔國公沐昌祚加太子太保賜蟒玉各廕一子賞賚司道府州縣銀緞各有差

陞劉綎鄧子龍俱都督同知副總兵

蛻按此役劉綎功最而鄧子龍攀枝花捷後無聞故露布內亦俱不及今劉陞陞賞相同何也又巡撫董裕師宗何鉦一則會疏請兵一則隨軍宣諭而功賞俱不及乃知軍興尺籍其有無虛實固不可以常理拘也噫

秋八月鄉試通省生儒取莫與京等四十五人

志成進士者莫與京張弋邵年齊

冬車里八百俱奉方物貢獻

附隴川逆酋岳鳳解京獻俘告廟儀注萬歷十三年九月日禮部儀制清吏司爲仰仗天威計擒元惡恢復疆土恭報西南蕩平以紓聖懷事奉本部送該本部題本司案呈本部送先准兵部咨稱雲南鎮廵等官某某等恭報節次擒斬逆犯首級二千一百二十八名顆及逆賊岳鳳父子等五名績添莽糜啞安得皮一名押解到京乞要擇日祭告郊廟宣捷獻俘等因題奉欽依移咨前來該本部照例題請於本月二十九日早遣官祭告郊廟是日御前宣奏捷音百官

滇雲歷年傳

卷九

二

吉服致辭稱賀其獻俘另行擇日具儀題請等因奉聖旨是祭告南郊遣官徐文璧北郊朱印禎太廟駙馬侯拱宸各行禮欽此欽遵隨行准欽天監手本擇到本年九月初三日辰時吉獻俘等因到司案呈到部臣等謹將獻俘合行儀注開坐上請伏乞聖裁等因萬歷十三年八月二十三日本部尙書兼翰林院學士陳等具題二十五日奉聖旨是欽此欽遵擬合通行爲此合就行送該司卽行各該衙門欽遵施行計開一前期禮部告示文武百官具朝服詣午門前行慶賀禮一先一日內官設御座於午門前楹正中

是日錦衣衛設儀仗於午門前御道之東西教坊司
陳太樂於御道南東西北向鴻臚寺設贊禮二人於
午門前東西相向設文武官及諸番使人侍立位於
樓前御道南文武西相向及刑部獻俘官位於午
門前御道東稍南西向設獻俘將校位於午門前御
道西稍南北向引禮引文武官東西序立獻俘將校
引俘列於午門前西邊武班之後伺候上位常服御
皇極門鐘聲止鴻臚寺跪奏請上乘輿樂作至午門
樓上陞座樂止鳴鞭訖鴻臚寺奏宣畢贊獻俘將校
引俘至獻俘位北向立定俘跪於將校之前刑部官

詣樓前中道跪奏云某官臣某奏某官以某處所俘
獻請付所司候旨傳下刑部領旨訖卽同將校押出
施行文武百官入班北向立喝排班班齊致辭官詣
中道跪致辭稱賀訖贊鞠躬樂作五拜三叩頭興平
身樂止鴻臚寺跪奏禮畢樂作駕興樂止百官以次
退右儀注亦載南詔野史似從邸抄中錄出者事屬
雲南所獻之俘且以見明時典禮之一端故附存之
十四年丙戌趙州甘露降

二月蒙化地震城堞官民居俱圯人畜死傷不少

遊擊劉天俸復迤西二城事下巡按御史蘓鄴覈奏以

冒功覆被逮併及金騰兵備俱下獄人咸寃之

滇攷迤西思威既內附其屬部有密堵送速二城久爲緬據威提兵復取之十四年莽應裡徵二城兵不應怒攻破之以多曩長散鐸率兵屯守思威糾思化思順各土兵又求助以復二城遊擊劉天俸令募兵五百往助之緬見以爲漢兵大至驚潰威乘勝殺緬千餘人并二城之從緬者陣斬緬多曩長遂復二城金騰兵備李材上其事下蘓鄴勘覆時在陣多土兵不知取級旣而復往則已腐爛遂以冒功覆奏逮材天俸下獄論者寃之

滇雲歷年傳

卷九

四

輓按是役也通志所載微有不同云劉世曾以提聞陞按察使李材右僉都御史巡撫勛陽後巡按御史疏論迤西功多戮屍抵級下李材劉天俸獄削劉世曾籍以兩者比并觀之似滇考得實要之苟圖了事擒岳鳳時已有成見則迤西之功當事所不願自宜劉李之逮獄矣

十五年丁亥巡撫劉世曾黔國公沐昌祚誅羅維叛酋者繼榮改設羅平州

志羅維酋者繼榮叛撫鎮擊斬之遂改羅維爲羅平州設流官後繼榮黨董仲文復叛旋亦剿平

騰越饑七月地震

九月五色雲見於曲靖之西

猛哈思化據蠻莫巡撫蕭彥密令撫夷同知漆文昌撫諭之

滇考十六年九月思順亦投緬朝命以思忠等歸義
陸忠猛密宣撫思化猛哈同知思順蠻莫安撫如邊
城所議也比符信至而思忠思順等已復投緬乃以
忠母罕烘順母罕送各代子領該司印十月應裡攻
猛密罕烘不能拒率其孫思禮從子思仁奔猛廣而
猛密失猛哈思化復進奔蠻莫據之罕送率其子思
滇雲歷年傳 卷九 五

華奔騰越時有問罪思化之議巡撫蕭彥密令撫夷
同知漆文昌撫化文昌單騎入化壘化稽顙聽命且
云奴有助逆西殺緬賊功今無所歸願寄食於蠻莫
從之

十六年戊子澱江元江地震

二月曲靖雨雹晝晦歷辰巳午三時

四月永昌姚營兵鼓譟索餉劫同知爲質抄掠抵省巡
撫蕭彥伏兵要隘要擊之斬其魁范高謨餘俱省釋還
伍

閏六月臨安通海曲江同日地震有聲如雷山木摧折

河水噎流通海公署民居皆圯壓死者衆曲江尤甚

楚雄早

詔省銀場道分屬四守道

蛻按成化十九年增設布政司參議一員按察司僉事一員同管理銀課至此幾及百年矣然其間銀場有時停止豈官設依然尸視而不改乎分屬四道宜矣考南宋冶場多在閩粵而亦屬道員兼官竊嘗謂此等場務歸之守巡固是但周禮不過下士之職屬於監司方面未免傷體酌委丞倅領之似爲得至若牧令受地方之寄簿書期會政務紛繁又寧可令

滇雲歷年傳

卷

六

其當爐事鍛以作此不急之務乎

秋八月鄉試通省生儒取朱思明等四十五人

志成進士者朱思明趙日亨王元翰朱化孚王夔龍十七年己丑省城地震

臨安石屏芝草生

迤西思遠進象及方物詔遠爲孟養酋長

滇攷十七年迤西思威死其支子思明子思遠進象

及方物朝廷令遠爲孟養酋長

十八年庚寅彗見東南經旬乃滅

設羅次縣學

莽應裏進兵孟養遂破猛拱思遠奔蓋西

滇破十八年應裏報密堵送速之怨進兵孟養遂破
猛拱遠與子思昏奔蓋西應裏僞署堵罕於孟養甕
罕於猛拱十一月緬破猛廣罕烘思禮與思忠妻甘
線姑奔隴川思仁奔雅孟猛廣亦失

澂江旱

五色雲見於蒙化西山

設新平縣改直隸新化州屬臨安府

志是年討平平甸鄉夷賊丁苴白改夷普應春等置
新平縣明年改新化州隸府

滇雲歷年傳

卷九

七

十九年辛卯澂江旱民饑

安寧火

永昌竹實

二月辛卯臨安大風拔木揚沙翻屋瓦

莽應裏率夷賊圍蠻莫攻迤西鄧子龍擊敗之

滇破十九年應裏率猛別阿瓦糾堵罕甕罕兵圍蠻
莫思化告急時鄧子龍方聽勘奉檄率兵至羅卜思
莊緬敗退去化還蠻莫六月應裏遣使等毋海弄查
賈貝葉緬文來求通巡撫給榜文送緬使歸

七月騰越地震城崩數十丈軍民廬舍皆壞

八月鄉試雲南通省生儒取王致中等四十五人

志成進士者王致中楊應登陶珽俱祺楊師程孫學

易

二十年壬辰彗星見

大理地震

騰越饑

巡撫陳用賓題設蠻哈守備防緬從之

傳用賓晉江人有雄畧用兵如神甫下車察滇形勢

卽題設蠻哈守備

蛻按萬歷七年指揮方謐率兵戍蠻哈隴川多土寧

滇雲歷年傳

卷九

八

以爲不足拒緬後果無所用今設守備豈果勝於前
戍乎異時亦未嘗一得其濟而謂察滇形勢以設置
者或亦未然後之入關二堡庶幾近之

莽應裏令阿瓦迺西犯蠻莫鄧子龍擊之把總李朝岳

順戰死緬尋退去

滇考二十年思仁叛投緬仁烝其嫂甘線姑因欲得

之時線姑隨罕烘思禮寄隴川仁自雅孟率兵衆犯

隴川欲虜線姑隴川宣撫多思順有備弗克逞懼中

國罔罪乃同丙測奔緬應裏僞立思仁於孟密當事

者移魯罕烘思禮於芒市六月應裏使擺線由迺西

賚貝葉緬鐸招隴川干崖南甸諸土司當道給緬使
文告令之還九月應裏令阿瓦迤西犯蠻莫思化等
奔等練山參將鄧子龍提兵營等練緬兵屯遮邊子
龍發兵擊之戰於控哈斬首百餘級把總李朝岳順
戰死緬退屯沙洲我兵無船不能進相持月餘緬尋
退去

二十一年癸巳姚安大水

豹入臨安南門

二月天鼓鳴於永昌歷子丑寅三時已而大風拔木

十二月省城地震

滇雲歷年傳

卷九

九

莽應裏分道入寇巡撫陳用賓親至永昌遣將合剿多
所斬獲緬退築關屯戍而還

滇破二十一年應裏以允墨守蠻莫墨乃糾猛拱堵
罕孟養甕罕猛密思仁兵號三十萬象百隻以普坎
雍罕直郎三鷲酋率衆擁送允墨據蠻莫思化敗走
墨等立九大營深溝高壘爲久駐計仍分道丙犯一
入遮放芒市一入臘撒蠻額一入杉木籠并出隴川
多思順不敵奔猛卯二十二年春巡撫陳用賓出駐
永昌聞賊大入等練隴川乃分部以參將王一麟奪
等練中軍盧承爵出雷哈都指揮錢中選張先聲出

巒哈守備張先亂出打線一麟擊其前承爵中選擊其左右賊狡甚始以羸老兵數人飲馬江干而浴之前鋒者擊而俘焉以捷聞居數日又以一象馬數匹來我兵又擊而俘之又以捷聞緬兵逃走遂復巒莫因以賊爲易與鼓行而前不知賊兵潛伏營於崖箐乘我兵過半賊衆湧出我兵被截時寧州目把者義領兵在前失道陷泥中爲賊所殺後二營相繼退奔監軍同知姚允升收殘軍用百金買諜者書伏夜行望等練諸山火光不息知賊已焚巢退去因稱勝而還是役也緬取道隴川猛卯多俺實導之多思順怨

滇雲歷年傳

卷九

十

俺乃糾思化并芒市多泰等擊俺殺俺子多荒十二月俺糾思仁丙測猛卯襲遮放我兵戰却之斬級百餘巡撫陳用賓以緬數入犯築八關於騰衝之邊曰萬仞曰神護曰巨石曰銅壁曰鐵壁曰虎距曰天馬曰漢龍每四關設一守備戍之又募習夷路者得閩人黃龔使暹羅令與得楞夾擊緬多俺自遮放敗還不復歸猛卯投木邦負隅於曩義山殺天馬漢龍二關工役督王漆文昌計授木邦罕欽令擒之謀頗露俺欲奔擺古欽追及於雷聳并其子多烘多曩斬之緬因俺死頗侵寇我東路云

二十二年甲午詔復加貢金三千兩

志後至三十六七年沈儆儆爲巡撫始奏請仍照舊額滇亦困億矣哉

廣西府火官署民舍俱燬

姚安大疫

秋八月鄉試通省生儒取金本高等四十五人

志成進士者金本高陳龍光

二十三年乙未設易門縣儒學

姚安大水

二十四年丙申姚安火燬民居百餘所死傷者甚多

滇雲歷年傳

卷九

十一

四月太子太保黔國公沐昌祚請告詔准致仕以其子釁爲都督僉事襲爵鎮守雲南

築平麓城議屯田

滇攷二十三年旣築八關二堡於三宣要害以戍緬并議興立屯田以紓遠運至是復築平麓城於猛卯大興屯田是時軍興旁午餉費不貲轉輸米石運價至十金而值不與焉諸郡邑不支故用賓銳意興屯三宣之內屬夷徭賦所出餘田無多惟猛卯古麓川地阡陌膏腴多俺旣死無主乃議以營兵任屯非營兵而願屯者聽二年小成免其賦三年大成始什一

而賦之

八月省城激江路南陽宗鎮南地震

九月姚安定遠景東地震

雲龍州碩鼠長尺餘群食禾稼俱盡

五色雲見於臨安之西

賓川大水民饑食竹實以濟

二十五年丁酉大理大疫

蒙化旱人多饑死

二月順寧土酋猛廷瑞與大侯土酋奉赦構殺巡撫檄

參政李先著副使邵以仁參將吳顯忠會勘相機行事

滇雲歷年傳

卷九

三

廷瑞遣子赴先著受撫以仁襲執誅之先著被劾死於

獄設順寧府流官改大侯爲雲州

徐擺府志餘抄猛廷瑞土知府猛闕六世孫相傳孟

獲弟孟優之後初娶灣甸土州景宗正女繼以反目

乖離歸寧不逾年另娶大侯土官弟奉學女景氏

恨之會奉學與赦不相能學奔廷瑞藉婿力以抗兄

遂連年構殺巡撫陳用賓檄李先著邵以仁二道及

參將吳顯宗會勘相機行事時景宗正子景從爲土

官欲爲其姊報讐潛遣部落謬爲猛夷間道至永昌

夜燒霽虹橋俟火熾人擾時揚言而遁曰我猛氏之

役也於是四遠相聞以爲廷瑞畜謀不軌故焚橋拒
命也迨先著至開說禍福廷瑞懼使其子攜印賈金
聽命先著恐其不信遂收金充餉許其歸誠而以仁
後至隨灣甸焚橋之計景從又請爲嚮導以仁遂謂
先著通夷納賂告之撫軍一面會兵襲執廷瑞已而
撫軍上其事廷瑞誅死先著卒於獄設順寧府流官
八改大侯爲雲州按景從灣甸土知州宗正之子萬歷
三十年同弟宗材導緬寇入姚關事敗宗正死於兵宗
材伏誅子從幼免死降爲土州判至是以協襲廷瑞
功復陞土知州廷瑞死人咸寃之而巡撫亦稍稍知
滇雲歷年傳

卷九

七

其無反情乃聽民立祠祀之

三月省城雹殺麥

秋鶴慶大雨雹傷禾

八月鄉試通省生儒取李中和等四十五人

志成進士者朱世昌楊若予潘允中

十月緬令思仁丙測等寇蠻莫參將吳顯宗遣兵擊走
之斬丙測

二十六年戊戌正月車里老搠刀舊猛怕猛等入貢

夏鶴慶旱蝗

六月耿馬罕們灣甸景從鎮康刀悶摸蓋達刀思權等

亦脩貢事

九月順大餘孽奎轟猛思賢等叛巡撫陳用賓討平之戶科給事中包見捷上疏諫開鑛黜爲貴州布政司都事

傅見捷字汝鈍臨安建水人八歲能詩萬曆己丑進士選庶常改給事中時中貴四出採金權稅雲南更困捷力諫章凡十餘上中有云開鑛之害陛下謂徒取山澤在鑛使實奪之民間槌擊入山者十二載虎兕出押者半天下詞意激切上震怒謫之後歷官少宰著有雲南志草

滇雲歷年傳

卷九

十四

十月詔下雲南大理採石

志點蒼屏石嘉靖十八九年間曾奉採取今以兩宮鋪地令採鳳凰石百餘求之實難供役者十死六七巡撫陳用賓奏請以順寧府隸金騰道

志終明之世爲府二十領州三十六縣三十二又分置各衛所附焉

十二月孟養思轟葉緬來歸進象隻方物

二十七年己亥緬擊思轟撫巡檄各土司赴救緬潰歸憂鶴慶大水無麥民饑

五月永昌大水

七月雲南縣天鳴東南次日晝晦至午

八月嵩明路南曲靖地震

九月永昌地震

二十八年庚子詔雲南撫鎮發漢土官兵協討播酋楊應龍巡撫陳用賓出駐曲靖黔國公沐獻出駐澆益參將謝崇爵統兵進征失機斬於軍前

平壤錄播卽秦所開五尺道屬夜郎苜蘭牂牁以名州始於唐也貞元以前多處遷客僖宗時沒於南詔朝遣招討使太原楊端糾兵破走之值唐亂亡端遂留兵不返至孫名番專有其土宋雖設吏寄寓而已

滇雲歷年傳

卷九

十五

明洪武初其裔鑑納土歸順乃改爲宣慰使司分隸四川其地周圍遠近三千里西北出四川綦江南川爲前門南出赤水烏撒水西黃平爲後門其東出湖廣偏橋沅州爲右脇凡聯三省西南輿區也至楊應龍於萬厯元年襲職淫凶殘賊奢僭驕暴罪狀萬端宮室服用上擬帝王宣淫衆室殺人如飴又殺前妻張氏并其母及族人等於是五司約結與應龍爲讐而七姓讐民并張高彭年楊溱羅承恩何承恩等合奏楊應龍殺死岳母嫡妻等命閹割民人爲太監奪占幼婦爲宮眷殺死長官抄沒親叔等事疏成用五

司印托言興學事得上時萬曆十六年也朝廷准行川貴撫按官會勘應龍大怒盡殺張高等妻子不留又暗結關外生苗殘五司騷六衛甚至破邑堡劫庫藏貴州巡撫葉夢熊疏播非大征不可而川撫按又議撫朝議不能決第行兩省會勘應龍赴川勘不願赴黔乃就彭水縣適中處聽勘川黔意指水炭囚應龍於重慶二年時倭犯朝鮮徵兵應援應龍令心腹輦金帛入京訴辨禁繫非辜願自將五千兵報効入贖錢十萬充餉兵書石星題覆奉批釋應龍追贖次日復有人言應龍鴛鴦難制不宜釋石星覆仍繫之

滇雲歷年傳

卷九

六

邵文至川而川官已令應龍次子可棟代繫而縱應龍去矣從此屢提不出朝廷重疑川中有私乃歸罪李御史削籍去王巡按象坤來嚴提完案應龍將差官兵快一齊殺死於是四川巡撫王繼先貴州巡撫林道楠皆一意議剿奉旨川兵剿播貴州協助止擒應龍一人不許貪功妄殺二十二年正月川三貴一分四路進而貴兵不進四川第一路帥副不知喪師二萬人惟第二路熟知苗情招撫而進兵不血刃直抵婁山暫駐第三路進至湄潭遇應龍大兵一枝把守二月內與苗接戰頗有斬獲而王巡撫以他事被

兵科論罷卽時撤兵黔御史薛繼茂與林撫不合疏
言播決當撫林疏反之謂決宜剿薛又以拔兵不舉
罪林而林諉川已撤兵且據拾陰事互訐不已上乃
特命侍郎邢玠總督二省兵部郎張國璽爲贊畫率
領諸將嚴兵討播實受相國私授意以朝鮮未寧姑
容招撫完事玠既到令太守王士琦遊擊吳文傑瞿
塘衛經歷等入播示總督勘撫好意應龍不出而擇
貌自己者數人齊對士琦輩佯不知也事踰半載玠
檄催結案勘官乃議罰贖四萬兩草其營事令伊子
朝棟應襲宣慰取應龍認狀二紙玠遂以播酋就撫

撤兵而歸時二十三年立秋日也應龍益肆要可棟
出獄方肯完贖官府又欲完贖後釋放相持經年可
棟獄死應龍令人取屍棺不發應龍統兵驅千僧直
至重慶城下發喪招魂遠近震恐又加恨五司七姓
奏民密訪搜捉盡被殺戮其有逃在瀘州合江等處
者應龍皆以苗兵逼其城索出刳磔鬻食獲其妻女
令宛苗對其父夫媼之或燒蛇入其腹以共爲笑樂
又盡掘土官墳墓燒骨揚塵二十六年遣從弟楊兆
麟托名進獻皇木帶五百人入涪州所過雞犬皆空
人民逃竄其實令其緝捕逃匿奏民也一二年間播

禍之烈亘古未聞於是蜀撫譚希忠巡按王明趙標
兵科侯慶遠各疏請大征然是時倭方悔盟未暇西
顧應龍愈加放肆分署群賊職事私立統制名色顏
其門曰半朝天子稱爲千歲每云大做一番朝廷也
無奈何我左右歸還二箇撫字養寬苗數萬名曰硬
手又結關外生苗爲老虎兵無慮數萬時黔撫江東
之有聲望難民日每聚哭於軍門前土官宋世孝毛
守爵以播酋逆謀顯著請兵據江防守餘慶草堂二
司官無存任之所妻子奔竄黃平城中應龍遂犯黃
平勒要土官家屬操備恐其屠城放出二司家眷俱

遭殘害江撫大怒具疏請討楚撫支可大亦題叛酋
倡亂奉旨各省同心防剿時新添衛經歷潘汝資大
言能擒應龍江撫輕信於二十七年令其督兵三千
同遊擊楊國柱等進兵應龍聞之笑曰自來送死矣
至飛練堡地方遂皆覆沒無一人存者江撫罷去以
郭子章代之朝議播事紛紛不一獨大學士沈一貫
兵書田樂至大征言此酋爲惡百端兩次勘問皆務
姑息養虎貽患何以鎮攝於是推用原任遼東巡撫
李化龍專剿總督川貴湖三省李督忠清謹懇持重
有謀故特用之此時朝鮮難解將東征有名將官如

劉綎者先撤回聽用應龍以爲不過調集土兵而已
乃點兵六萬出在點脚壩分爲三路擬犯合江旗書
擒王剿叛時李到督未旬日一面行文浙江山東山
西陝鎮各調兵一面令總兵萬鰲重摘松潘兵馬相
機防禦播賊萬餘在幹水屯劄二十四營綦江守將
房嘉寵等與戰大敗死之綦江破殺虜俱盡自合江
南川江津至重慶一路人民驚惶逃竄遂爲空城李
督星調各土官守禦查拿奸細一日而得十六人萬
總兵皆撲殺之一面令王之翰守南川楊敏政守合
江王夢吉守瀘州時內地兵馬漸集聲勢漸壯賊遂

滇雲歷年傳

卷九

五

遷延不進李督遣牌諭云楊應龍雖有進剿之旨然
部議猶令兩省巡按會勘其人尙在生死之間若悔
罪乞哀尙有生路今不知何故統領多兵突犯內地
意欲何爲豈不知四海九州比之一播孰大應龍之
勢比之劉東陽平秀吉孰強豈天奪之魄自取滅亡
令傍觀者欲救之不得耶今幸兵未深入若其速行
歛退歸巢猶可圖全若更猖獗不已則雖欲保全之
不可得矣該道卽便差人速行曉諭以後彼有差人
勿得殺害兩國交兵不拒來使况彼原係土司乎聞
彼以他界防兵爲辭此只宜具文申請何事張皇乃

爾自速天誅也應龍以撫是向來虜套始撤兵回而
以文來訴寃且索奏民屍棺之類李督批云播州係
累朝爵土應龍亦素有功勞朝廷安忍一旦廢之以
貴州報伊戕殺官兵不言剿則無以示四夷耳觀部
覆猶欲兩省行勘尙爲伊留恩伊乃公然狂逞何也
意欲示武於人不免增罪於己誰爲應龍畫此計者
愚亦甚矣今日之事旣云激於控訴無門若斂衆歸
巢靜聽處分尙可自解該道宣諭知之應龍遂竟不
出各城始得保全七月差人到府取可棟屍棺回墓
道府優禮歸之應龍具文申謝已而綦江奏至嚴旨

滇雲歷年傳

卷九

三

切責撫鎮文武等官將道府提問着李化龍便宜行
事馬上催劉綎到任而軍門所調各處兵馬已紛紛
入川應龍知之集兵自備分撥四路要隘當援以爲
戰守之計總督調水西兵三萬守貴州省城以斷賊
招苗之路而重慶集兵亦已萬餘劉綎業到數日合
江南川江津瀘州諸處又俱有備以是賊不敢窺川
惟一攻永寧被翼兵所敗殺溺死者三四百人賊氣
益奪十一月賊子朝棟徑打東坡爛橋殺死百戶劉
經仁等於東坡劄營又於興隆坡劄三營通引諸苗
不時出劫官道不通者三月在在賊衝處處生息李

督郭撫會議於東坡爛橋重安三處各設兵一萬以
通道路李督又將部議賞格刊行懸掛其長官袁年
王繼先首先納降給賞如格於是賊之手足腹心降
者日至而賊復犯龍泉殺虜官兵總督聞報遣將應
援而總督亦於此時移駐重慶郭撫行令漢土官兵
將屯劄苗賊盡數擒剿官道遂通此時兵齊餉足李
督乃以天下兵馬總三十萬分爲八路進兵四川四
路貴州三路湖廣一路黔撫郭子章駐貴陽楚撫支
可大駐沅州分派已定李督於正月十五日率大小
文武八省官兵大會於重慶府較場誓師犒賞俱以

滇雲歷年傳

卷九

五

二月十五日開刀進剿兵科給事中張輔之題請賜
之尙方劍不用命者先斬後奏以重事權從之朝議
添設偏沅巡撫推江鐸爲之楊賊懼日夜修理海龍
囤蓄糧儲仗以爲退守之地三月三十日劉綎總兵
由川東綦江路入叟山關三戰克捷厥功最三月初
八日馬孔英統兵由川南合江路曹希彬由永寧路
俱入岩門關關外招降數萬兵不血刃入關每戰必
克允爲全功四月二十三日陳璘由湖廣偏橋路入
小三渡關直逼海龍囤掃四牌下長坎開進兵之路
立克播之基功上上三月十五日陳良弼由龍泉哨

轉戰進關與大帥陳璘兵合功第二貴州烏江河渡
路大帥童元鎮賊素輕之因欲縱之過河方以計取
三月十一日謝崇爵督率滇兵泗城兵奪占河渡關
被賊兵衝截謝將部兵先走滇泗兵俱奔爭過浮橋
纜斷淹溺無數明日永順土兵又遇賊冒混鏖殺幾
至盡死無遺積屍填河水爲不流此一路三萬人所
存不及二千現在將官只有童元鎮張秉忠謝崇爵
強樹四人而已報至督轅以尙方劍斬謝崇爵示衆
至四月二十一日岑紹勳復奪河渡關轉敗爲功泗
州與永順皆有力焉此路兵於五月初方入白田壩

滇雲歷年傳

卷九

五

三月十九日朱鶴齡由貴州沙溪路入落濛關激勵
水西大勳克集功第一四月十二日李應祥由貴州
平越黃平入黃灘關以守爲戰以招撫爲進攻緩急
進止其機審矣功上上楊賊見各路兵俱已入關分
派親信提兵四路把守自率萬七千人上海龍圍集
兵關內連與官兵戰又投文詐降吳廣詐應之而嚴
爲備復捲土來戰廣又力戰敗之賊劫南川營復敗
以去陳璘兵又攻白田壩遂父子相哭上圍於是群
心渙散更不抵截官兵五路一齊殺入劉綎自冠子
山進馬孔英自高坪進吳廣自水牛塘進陳璘自上

渡關進李應祥自張王壩進安隴自大水田進各鎮漢土兵約二三十萬殺奔海龍圍衆苗鼠竄剽殺幾盡推官高折枝令酉陽宣撫冉御龍至金川壩養老闌招降無數內有原擄綦江生員陳萬民陳三策并已故舉人周胤宗妻萬氏等差官護還原籍四月十八日各營先後俱進逼海龍圍下劉綎駐紮馬城李應祥駐望軍城吳廣駐紮鷄城陳璘駐圍前左山馬孔英駐圍後右山安兵駐圍後山左隴兵駐圍後山右四面設木柵長圍各營備找廂飛梯巢車攻圍之具又分遣劄營十里外海龍壩等處以防奔逸賊無

滇雲歷年傳

卷九

三

計遣叔楊永用詐降先總督已有斬使焚書之令因卽將永用斬首整兵以待賊隨擁陣出戰馬湖土兵奮力攻打衝破鐵柱飛龍二關次日賊又遣鄉導刻話乞以田氏於二十九日早具表投降是日同各將領齊至圍邊見田氏率其子遠隔圍下在地名三十六步處俯伏跪投降表道鎮稟帖訴狀一紙各鎮責田氏親自來營則逐日延捱不至總督委按察使張梯總監各軍要盟諸將刻期進剿賊又詐稱身死吳廣信之李督令具受誑承罪甘結乃不敢言初十日議攻鐵柱關圍後曹希彬與陳璘抄賊營後齊起來

擊遂奪營前二土山移劄其上而賊樵汲之路遂絕
當日辰刻各路兵分道先登燒拆關樓殆盡圍中哭
聲動地賊勢迫甚乃猶死守不下於是七道監軍會
呈各鎮合爲五營各限日期輪攻圍後不許一路專
功五月十九日輪番前後攻打行及一月竟未能下
陳璘知圍後畧平易攻請督府勅水西營退讓一舍
二十二日璘撤營從圍後五槽駐劄豎立排柵圍至
圍後防賊夜衝又置鐵牌百餘面步步捱前防賊放
射我兵遇夜放箠板於柵外防賊偷劫六月初四日
南川營發兵斬飛龍關守賊六級是日又會議分番

滇雲歷年傳

卷九

五

攻打劉李共一日陳吳共一日各打後門不當日者
又各攻圍前以牽其勢馬孔英督令各路兵端攻前
門初五日劉李寅時發兵縱身先士卒辰時攻破頭
道土城巳時破二道石城賊親出衝突三次我兵用
礮齊打賊被傷退三城死拒我兵劄營城下是夜賊
以數千金募死士無應者自起提刀巡壘四周營火
燭天歸向妻子泣下數行因相聚號哭初六日陳吳
攻打璘先出衝鋒銀二千七百募死士密令四鼓啣
校前進陳良珙陳策從左王鶴鳴宗大斌從右桑植
容美茅岡上下峒土司居中五鼓至圍寂無人聲各

從山坡緣上蟻附登城賊猶鼯睡當將守城老虎賊
二十餘人殺訖衆兵齊上更豎小白旗三舉號礮賊
始驚起奔竄無路卽同愛妾周氏何氏登樓自縊縱
火自焚時天黎明衆兵撲滅其火吳廣打開樓門出
賊全屍生擒賊妻田氏賊子楊以棟惟棟良棟堪棟
勝棟賊子妻五口皆田氏賊女貞惠貞瑞貞福賊孫
嵩壽春壽賊首何漢良僞內官并家人乳母婢僕等
若干人本司銅印一并僞造驃騎將軍鉛印一時天
已明兵將會集城門大開五鎮七道齊到圍圍搜捉
賊子楊朝棟逆弟楊從龍兆龍世龍小田氏朝棟二

滇雲歷年傳

卷九

五

子三女賊族楊兆麟賊妻兄田一鵬賊婿宋承恩馬
千駟賊軍師孫時泰黃七賊黨張世爵等九名鎮道
將賊屍喚伊妻男及五司奏民周世祿等驗實解總
督轅門奏捷獻俘於是三省及各路兵將奏凱班師
是役也軍需所用幾及三百萬兩獻俘一百四十一
名口內楊朝棟等處決楊應龍劉屍張世爵等發遣
宋承恩放回還職朝命各官會議改土設流按播州
白田壩沃壤數百里建遵義府治管遵義桐梓仁懷
綏陽四縣直安一州平越府管平越餘慶甕安湄潭
龍泉五縣黃平一州先是黃平設撫苗通判列銜重

慶府今改設州隸於黔省播平總督李化龍令將軍
前原給銅鍋盡數收回改鑄銅鼎分爲三等給發各
土司永爲鑒誡其鼎銘曰維星拱北維水朝東天王
御極八方會同惟西南夷各世其封惟敬天念祖庶
不墜厥宗順天者吉逆天者凶以爲不信視楊應龍
又鑄銅柱高一丈三尺鐫文於上豎海龍國之顛文
曰皇帝二十有八年播人告訏天皇赫怒爰整六師
以誅不供百十有四日盡俘群醜遂潑其宮設吏治
之方三千里始入封皇我勒銅標永鎮西南臣李化
龍

滇雲歷年傳

卷九

五

蜺按凡此平壤俱屬川黔之事於滇雲不過發兵協
討而已則於傳中書之數言可了乃不惜連篇累牘
以錄之者蓋以有明三百年西南師旅此爲最大而
所以致此者由於當機不斷築室道謀苟非隴西公
智勇運籌則三省必爲壘粉矣故此中有足誡者焉
有足法者焉我欲留爲經國籌邊之君子獻也

六月播酋平撫鎮解嚴還省城

富民楚雄騰越蒙化北勝大水

永平霪雨經六閱月

賓川饑

嵩明槐無華

秋八月鄉試通省生儒取藕鴻等四十五人

志成進士者陳鑑趙琦潘一柱石應嵩宣大勳

鎮南地震有聲

尋甸旱民饑地震經月

大星隕於騰越城

冬臨安大雨雷瀘江堤決

十月雲南州縣同日地震

二十九年辛丑蠻莫思正襲隴川阿瓦雍罕攻思正

奔騰越檄鎮將殺之

滇雲歷年傳

卷九

七

滇考蠻莫思化子思正乘多思順之喪襲隴川據其

妻罕氏明年阿瓦雍罕攻思正木邦罕拔子罕禱率

十兵從之正奔騰越當事者殺正以止兵

省城夏秋不雨民大饑

潞江自二月至六月不雨

永昌螟大饑

七月晦尋甸地震

九月省城大雨雪

昆陽尋甸易門鎮南產嘉禾三四五穗不等

鎮南牛生雙犢

是年十一月昆明羅漢山岩崩
三十年壬寅六月築順寧右甸城

九月建雲龍州城

冬臨安大水決河堤

三十一年癸卯阿瓦雍罕木邦罕益俱遣使欵貢

滇考自此邊境少康而緬酋莽應裏連年爲暹羅得
楞所攻長子莽機搗見殺擺古殘破亦不能復內犯
矣

蛻按永昌外夷緬爲大唐之驃國其類也蠻名阿瓦
元世祖由吐蕃三討之後於蒲甘緬王城置邪牙等

滇雲歷年傳

卷九

庚

處宣慰司明洪武二十九年始歸附立緬甸軍民宣
慰司與孟養諸夷互爲弱強至嘉靖中莽瑞體起洞
吾漸爲雄長於西南矣其疆東至八百界南至海西
至孟養界北至猛密界自司東北至雲南省城二十
八程其山曰小豹江曰金沙江濶水惡恃以爲險其
俗柔詐慄悍居屋廬乘象馬濟舟筏其文字進上者
用金葉寫之次用紙次用檳榔葉謂之緬書男子善
浮水縮髻頂前用青白布纏之婦人縮髻頂後不施
脂粉事佛敬僧有大事則抱佛說誓或詣僧誓之乃
決有五城曰江頭城太公城馬來城安正國城蒲甘

緬王城有兜羅綿樹類櫻葉卽貝葉也

臨安正月不雨至六月七月乃雨至九月方止又頻雨
雷遂無年

三月臨安東關產一豕兩首一身八足一尾

廣西府有白蝶自東而來群飛蔽天

秋八月鄉試通省生儒取兵國謨等四十五人

志成進士者段尙錦李聞詩張瓊

三十二年甲辰緬襲迤西思轟走死緬以頭目思華據
之

志緬攻猛密徵兵於思轟參將王廷光止勿發轟從

滇雲歷年傳

卷九

三九

之縛獻其使緬怒攻轟轟走死都司王萬年救之不
及酋長思華據其地

六月臨安大水沒田廬

三十三年乙巳雲南府署芝草生

巡撫陳用賓遣副將陳雲擒緬目多罕復蠻莫界

三十四年丙午正月指揮賀世勳韓光大等殺開採太

監楊榮

鑑先是楊榮肆虐滇人不勝憤火厰房殺委官張安

民禮部侍郎馮琦上言鑛稅之害滇以張安民之故

火厰房矣粵以李鳳釀禍欲剗刃其腹矣陝以委官

迫死縣令民洶洶不安矣兩淮以激變地方劫燬官舍錢糧矣遼左以余東蕩故碎屍抄家矣土崩瓦解亂在旦夕皇上能無動心乎不報琦又言鑛使出而天下苦更甚於兵稅使出而天下苦更甚於鑛陛下欲通商而彼專欲困商陛下欲愛民而彼欲害民陛下戒以勿任撥置而撥置愈多陛下責以不致驛騷而驛騷更甚陛下之心但欲裕國不欲病民群小之心必自瘠民方能肥已疏入留中戶部尙書趙世卿上疏請停鑛稅曰蒼生糜爛已極天心示儆可畏鑛稅貂璫掘墳墓姦子女陛下嘗曰朕心仁愛自有停

漢雲歷年傳

卷九

三

止之日今將索元元於枯魚之肆矣不報三十三年秋九月詔罷採鑛以稅務歸有司而雲南鑛稅猶如故時榮久於滇恣行威福杖斃數千人榜掠指揮樊高明等盡捕六衛官人人自危軍民無不攘臂於是指揮賀世勳韓光大倡衆殺榮死者百人徒黨輜重皆盡事聞上怒不食曰榮不足惜何紀綱頓至是賴太后解釋罪其首事世勳下獄死光大戍邊罷中使不遣以稅務交四川稅使邱乘雲

秋八月鄉試通省生儒取賀文明等四十五人

志成進士者賀文明張法孔段高選周良材楊芳盛

陳爰諷夏啟昌梁州彥楊掄按此榜最盛有一忠臣
四方伯忠臣段高選任蜀死奢寅之難謚恭節方伯
爲張法孔胡廷表朱家民段師文

九月白崖迷渡雲南縣雨雹如鷄卵有稜入地尺許禾
稼盡傷

廣西大水

十一月朔臨安地震隱如微雷以漸而盛城郭廬室崩
頽殆盡死者數千人每震時如有人搖白扇數月乃止
三十五年丁未正月有異鳥鳴於省城其聲曰殺

二月武定獅山與鷓鴣山鳴南北互應如松濤

滇雲歷年傳

卷九

三

夏彗星見

五月武定地震

省城在近田中有一禾二葉其實非穀非稗云是兵袂
十一月彗星見西方尾東指其色赤

去 武定土目鄭舉糾夷酋阿克反犯會城索武定府印而

志阿克有馬頭四十八人鄭舉獨豪有力富於財知
府陳典貪婪以廉訪收禁舉舉以兼金置魚腹餽之
獲免典無厭如是三四不已舉不勝其索乃糾阿克
反時典以入賀在會城舉等攻破府城殺指揮金守

仁千戶王應爵魏守蒸張斗梅應時等并男婦四百五十餘人遂擁推官白明通以兵隨其後直抵省城竟無一卒迎戰明通至城下求入不許乃請以冠帶印信給賊未允賊怒從北門外遶西南而東分道四掠沿村鎮市焚劫一空寺觀廟宇及軍丁營房僅存十之三四民之老稚不及避者殺之壯者掠而歸忽率衆南指有若攻城之狀須臾舍而西索武定府印甚急許之乃去明日復來索鎮撫不得已以印緹與之始拔營歸

尋甸夷目大理保等叛攻破嵩明州學正龍旌及吏目滇雲歷年傳卷九
三

志夷目大理保楊禮亦屢被官司責辱結連夷目招補阿白者色及夷婦海冲等叛攻破嵩明署印知事李性先棄印逃吏目韋宗孝學正龍旌皆闔門死之臨元道副使康夢相參將張名世統寧州土兵衛省城都司汪如淵率土兵救楊林禦大理保賊退攻尋甸殺指揮諸藩裕

志大理保等進逼楊林都司汪如淵率土司祿崇功李鳳兵赴救賊退歸攻尋甸殺指揮諸藩裕等

巡按御史周懋相調霑益土兵檄同知孫台督赴監軍

副使羅希益合兵進剿大敗大理保於尋甸

志巡按周懋相駐曲靖侯代當阿克初叛懋相貽書撫鎮囑其速爲寇備已而楊禮之報接踵而曲靖素稱貧郡庫帑空虛懋相惟以日用廩給及郡邑所報贖緩佐之先調海文明等土兵守城又調霑益兵備衛省會無何而嵩明告急兵甲不完懋相復患鞭長不及遂於附近調土官安紹慶領兵一萬人拒敵撫鎮疑紹慶不可用阻其行色慶稍愠懋相復厚加犒勞而溫言以撫慰之促其速赴敵所仍檄同知孫台督兵相應及紹慶抵嵩明而賊已直逼城下矣紹慶竭力衝突賊遂大潰追至尋甸大破其眾諸邑保全是役也雖紹慶捍禦之勇實懋相調遣撫勞得人應用之功居多焉

蛻按疑者開敵枉之門陳用賓先以疑而殺李先著今復以疑而阻安紹慶幾悞大事駐吏則庇之桀賊則畏之事來且首尾俱縮事過又鬚髯戟張其可笑也豈特閉門修齋縫城與印而已哉

三十六年戊申正月阿克寇祿豐破其城知縣蘓夢暘死之

志鄭舉等從武定寇祿豐夢暘率民兵力戰元旦日

方朝服祝釐衆賊擁至被執不屈死之子萬民疏奏
贈光祿少卿予謚立祠

左布政使彭應時右參政楊俊臣副使陳禔都司范繼
斌遊擊段晨守備裴希度王之瑞分討阿克

武定大疫

十八寨大水沒民居

六月諸路合兵剿賊俱平

滇攷六月諸路兵至擊賊斬其家屬十一名口阿克
鄭舉奔東川官兵追至東川境上土司祿哲縛阿克
鄭舉獻軍前左布政彭應時復擒其黨鄭文鄭宗舜

滇雲歷年傳

卷九

三

參政楊俊臣率廣南僮兵亦擊敗海冲等得嵩明州
各印信副使羅希益督安紹慶兵斬楊禮男楊成俘
其妻妾四口遊擊段晨擒楊禮妾及子四口兩路賊
俱平惟武定府印竟失所在

致仕黔國公沐昌祚奏武尋失事狀劾其子都督僉事
叡及巡撫陳用賓參將張名世俱詔逮繫獄仍起昌祚
視事

滇攷賊平俘阿克等九人於京正法沐昌祚奏劾撫
鎮失事狀沐叡除名陳用賓死於獄而起用昌祚鎮
守雲南自嘉靖初年至此七十餘歲之間內夷之變

凡八九起雖喜人怒獸蠻性固然亦惟貪黷有司實
逼致之獨異陳用賓以十七年巡撫整理緬事頗有
規模一旦變起蕭牆束手無策身填牢獄爲天下笑
言者謂威褻於久玩志墮於宦成有是哉非大豪傑
亦孰能以功名始終哉

十月巡撫薛孟雷劾武定知府陳典推官白明通祿勸
知州黃榜元謀知縣毛文彩俱下獄論死巡撫恩惠
十二月永昌騰越地震巡撫恩惠

三十七年己酉正月朔永昌地震至二十六日乃止

路南文廟產白燕巡撫恩惠

滇雲歷年傳

卷九

五

秋八月鄉試通省生儒取馬易從等四十五人

三志成進士者傅宗龍羅杰楊整綱于發藻楊棟朝按
宗龍官至總督死難諡忠壯

三十八年庚戌隴川宣撫多安民叛入緬巡撫周嘉謨
檄兵備黃文炳追斬之隴川平立其弟安靖

夏省城大旱巡撫恩惠

十二月定遠地震巡撫恩惠

三十九年辛亥正月姚安定遠地震巡撫恩惠

三月姚州大理地震巡撫恩惠

賓川地震有聲如雷巡撫恩惠

迷渡地震如蕩舟

猛卯地震聲如雷裂垣一綫

志猛卯在潞江宣撫西先是蠻莫思正死立正弟忠改姓衍數被緬侵不能支因安插於猛卯授安撫司蛻按外夷災祥不書今此條亦創例也或係該土司報聞書之以爲向慕華風之勸云爾

雲南縣九峯山甘露降於松柏如脂
四十年壬子巡撫周嘉謨巡按鄧漢請以沐鎮勳庄田租歸有司代徵

三月省城武定曲靖木密同日地震

滇雲歷年傳

卷九

美

三月省城羅次木密曲靖又同日地震木密城崩六十餘丈

秋八月鄉試通省生儒取惟嚴寅等四十五人

志成進士者徐天鳳楊應宿周昌祚張正道李柱明
四十一年癸丑二月水西土酋安堯臣與霽益土司安紹慶以讐構兵堯臣率兵入霽益殺傷甚眾巡撫周嘉謨具奏行滇黔兩省撫按會問

建馬龍州及祿豐縣磚城

四十二年甲寅雲南縣大饑

六月朔永昌地震二十三日聲如雷鼓

巡按御史毛堪疏請卹錄原任給事中毛王雲南參政
李先著不報

疏曰竊惟致身者人臣之分也旌賢者明王之典也
故骨鯁言事之臣不難捐生立名則社稷賴之鞠躬
任事之臣不難違衆特立則封疆賴之乃有功在社
稷封疆而死未霑殊卹生遭奇禍如原任給事中毛
王原任雲南參政李先著其人者豈非聖世之缺陷
事哉臣謹按雲南毛王右衛人登宏治己丑科進士
官吏科左給事中嘉靖甲申年議大禮廷杖身卒隆
慶元年贈光祿寺少卿夫人臣犯顏極諫至於血塗

滇雲歷年傳

卷九

七

丹地魂沉青瑣斯亦慘矣彼所爭者朝廷之典禮所
補者聖明之闕失忠肝義膽旣與日月爭光勁骨香
名又與乾坤并立在先帝褒嘉遺直業已薄贈其官
在朝野嘆惜孤忠猶爲未酬其烈蓋本官天鍾正氣
寧舍生以成仁身任綱常務轉圜而悟主居諫垣十
五載每言人所不敢言閉夜臺十九年惟死彼之得
其死所謂大忠之當亟錄者也李先著錦衣衛籍山
東人登萬歷丁丑進士歷陞雲南臨元分巡參政於
時適有順寧猛廷瑞與大侯奉赦構隙讐殺當事者
以本官原任瀾滄兵備素爲夷人所信服委同金騰

副使邵以仁參將吳顯忠提兵勦處犄角而進本官以猛酋無大罪且生靈塗炭可憫堅議撫之首持千金請命本官謂不受金酋不信遂以金發充兵餉酋遣子送印爲聽撫之質而金騰路乖其撫議徑襲擊廷瑞反誣搆本官被論逮繫竟死於獄夫人臣不貪啟疆之功以全生靈之命且使狡酋不信撫臣之屢檄而取信守臣之一言此其宣布威惠又安封圉爲何如哉而貪功之徒乘間而下石害能之輩操斧而尋柯三木囊頭天地且爲黯慘一腔熱血鬼神亦爲鑿憐彼接踵而逮同夕而殞者洵天道之好還而家

滇雲歷年傳

卷九

美

戶有祝郡邑有祠者尤人心之不死蓋本官一塵不染百折莫撓柔遠來稚髻之夷掩骼無鬼燐之哭救荒則瘡痍色起品題則多士從風疏水利則赤地成疇憫貧寒則青衿邀福徒失貴臣之心致干雷霆之怒功而見罪貞而被誣所謂大寃之當亟伸者此也近該禮部公議謚典考訂別白取其事功崇隆節義彪炳至重也期於耳必徵目聲必副情至覈也而要之直道至嚴也若玉之杖而死先著逮而死所謂社稷之臣誠死社稷封疆之臣誠死封疆事功崇隆節

義彪炳孰加焉二臣身雖往而忠耿不磨志未酬而風勵滋遠芳名光於俎豆公論定於蓋棺耳目之微情實之孚孰加焉國家旌一言事之臣而骨鯁者益勸旌一任事之臣而盡瘁者益奮匪徒招雪旣徃實以風示來茲裨聖德而存直道又孰加焉蓋以滇之孤僻而有如玉之以身殉國以仕於滇之間關而有如先著之以身殉職真貞元之間值而麟鳳之偶出者遠聽之臣咸爲追悼而況於廟堂之上乎臣觀風茲土從公咨訪在玉則身死之日貧無以殮今其子孫不能具饘粥臣檄雲南府修其坊表量給祭田在

滇雲歷年傳

卷九

三

先著則一棺尙滯淺土煢煢遺孀無以糊口臣捐資助塋復檄提學道祀之名宦庶臣所可爲者罔敢弗盡厥心也若夫旌直揚清之典非聖明留意孰暢此久鬱之公論乎皇上崇尙風化綜覈事功超出尋常萬萬先後忠諫之臣如楊繼盛予謚贈廕近且予祭矣如劉台贈官與玉同又廕一子矣大聖人之作爲寧不足磨勵一世激發人心哉然死於戍者已廕死於杖者獨遺非法之平也有罪者尙世衣錦之官而有功者竟斃錦衣之獄非所以示勸也臣有慨於中義不容嘿行據帶管學道按察使袁茂英呈詳前來

特爲題請伏望聖明不遺荒遠一視同仁勅下該部
再加會議將毛玉子謚補廕以表直臣李先著卽未
敢遽議諡典先行贈秩錄廕以表勞臣庶大忠可慰
大寬可雪公道明而人心勸臣節風而聖治光矣
蛻按毛玉已邀卹贈再請諡廕似屬過優李先著謂
之受誣枉死則可稱其有功封疆過矣夫功無兩立
彼旣以襲擊改設爲功則主撫業爲失計而又何以
爲功故只宜與之辨誣表潔復還原官不當與請贈
廕昭雪酌庸各有典制惟其立言之誤所以疏入而
不報也

滇雲歷年傳

卷九

四

四十三年乙卯詔減稅課三分之一增解額二名俱出
丙旨

夏省城大旱景東地震

秋八月朔楚雄地震城崩十餘丈姚安鎮南定遠同日
地震

鄉試通省生儒取趙璧烜等四十七人

志自後增減不常或增一名或仍舊額無定制也是
科成進士者蕭運泰吳宏業王錫袞何可及按錫袞
以尙書家居後爲沙賊所害

十二月建鎮南州及蒙自縣磚城

四十四年丙辰正月省城地震

四十五年丁巳七月晉寧地震

四十六年戊午雲龍三崇山鳴如雷

秋八月鄉試通省生儒取施堯中等四十七人

志成進士者廖大亨戈允禮趙奇猷雷躍龍李大受

四十七年己未十二月省城大雨雹雷電交作雲氣黃

白

四十八年庚申激江姚安廣西安寧富民新興十八寨

河西俱大水

二月己卯有雲氣黃紅漸變黑霧昏晦如夜大風雨如

滇雲歷年傳

卷九

聖

注宜良瓦石皆飄曲靖城堞傾三丈吹一人去地丈餘

方墜平夷折木無數哨兵舍吹去數里

乙丑夜月變黃黑色星晦無光

建水土酋刀春琪勾交陞兵入犯攻破五邦等地王弄

土舍沙源率衆堵截勝之斬其僞侯伯三人

雲龍州土酋段進忠殺姪段嘉龍謀襲其職巡撫沈儼

玠檄兵備熊鳴岐擒斬之奏改流官

戶部以邊餉不支兵部馬價工部器械不足復增雲南

地畝銀共一萬六千一百六十四兩

三月戊子省城產羊一頭如犬三耳八足黑蹄二尾遍

身白文

廣通鎮南洱海地震

甘露降於雲龍

七月庚子易門老場西嶽街地陷五十餘丈傾民居死者二百餘人

騰越產牛二首四目四耳

詔改萬歷四十八年為泰昌元年

綱鑑七月帝崩八月太子常洛即皇帝位詔以明年為泰昌元年在位一月有疾服李可灼紅丸九月帝崩是為光宗貞皇帝皇長子由校即位即熹宗也詔

滇雲歷年傳

卷九

星

以萬歷四十八年為泰昌元年

熹宗天啟元年辛酉恩例加解額一名

省城自正月不雨至六月米價騰貴

新興十八寨彌勒大旱

元謀地震聲如雷

六月猛卯地震有聲

秋八月鄉試通省生儒取劉廷祚等四十八人

志成進士者胡璉萬永康阮元聲李希揆李可棟李

思恂閃仲儼

十月羅次富民地震武定獅子山鳴

黔蜀土酋及巡撫沈做煥調兵分道赴援

十二月援黔師次安莊衛官軍陷沒都司李天常死之

志九月四川永寧土酋奢崇明奢寅貴州土舍安邦

彥相繼反兩省羽書交至徵兵於雲南十月巡撫沈

做煥調關省土兵於曲靖以副使黃士華監紀分道

赴援十二月都司李天常率援黔兵四千人至安南

衛水西賊將羅應奎詐降誘至疊水鋪伏發全軍皆

沒天常死之

省城地震

二年壬戌正月都司楊明廷將兵援蜀至畢節遇伏戰

滇雲歷年傳

卷九

三

敗死之

志楊明廷將兵三千人援蜀時烏撒土酋安效良先

與邦彥通陷烏撒衛殺指揮管良相明廷兵至畢節

效良伏兵阻截明廷兵潰與中軍程坤死之

二月有黑雲如蓋自北來覆省城

新興疫

霑益土婦設科土目補鮮李賢武定夷目張世臣等叛

糾東川酋祿千鍾入寇巡撫沈做煥以便宜起用原任

參將表善李思忠提兵分剿大破賊衆設科等攻嵩明

忽暴雷擊死東川二賊遂焚劫陸涼知州郭俊義戰敗

死之

志設科及土目補鮓李科李賢期曲等俱叛霑益尙
旬松林炎方交水白水六站堡俱不守併陷平夷衛
殺官吏武定夷目張世臣糾小東川賊千餘攻陷他
頗補知二堡沈撫便宜起用參將李思忠督兵守武
定張世臣來攻思忠與戰大敗之世臣遁東川土酋
祿千鍾祿阿伽等復勾通霑撒土賊合攻嵩明知州
王育德率軍民固守賊分兵陷亦佐平夷霑益等城
沈撫又起參將袁善督守備金爲貴土司沙源等馳
擊破之擒其目阿托得舊爲美縣印猶元治正年號

滇雲歷年傳

卷九

四

也是時寧州土司祿永命阿迷土司普名聲石屏土
司龍在田武定土司吾必奎等俱以巡撫檄率調兵
士從征力戰有功設科等復入陸涼州境焚劫各鄉
知州郭俊義戰敗被殺

建富民縣儒學頌印記

四月省城地震

參將尹啟易守備李加培周嘉映自交水督兵進霑益
安効良率水鳥賊至霑拒戰官軍陷沒加培嘉映俱戰

死

五月省城旗纛廟火

七月亦佐營長安應龍引賊補鮓等陷亦佐縣八月寇
越州衛

師宗隕霜殺禾

九月賊安應龍等圍羅平州

冬甘露降於雲龍

三年癸亥詔雲南暫停課金

沈傲爝疏畧曰盜未弭則添兵添餉勢不能免民未
安則焚林竭澤困不能支况以邊餉故有每畝九釐
之加派今欲少留涓滴以活滇人之命惟有請蠲貢
金一節夫皇上取金於滇豈以金爲滇之所產耶不

滇雲歷年傳

卷九

四

知商民裹糧重繭遠覓之秦隴近覓之巴蜀甚有至
京而反用重價易之以進者至於金價之所從來尤
不忍言或取之汰軍或取之搜括或取之閭閻或取
之商民之賄累吮血摧膚呼天搶地皇上不得而知
也金可有可無之物也早爲停止少留滇民餘力以
供邊餉九釐之加派少留滇餉萬一以救多凶多懼
之危疆臣度眼前光景金價決無所出來歲貢金決
不能辦臣惟有與地方諸臣席藁以待斧鑕而已此
疏上於萬歷末年至是始有是命

新撫閔洪學至滇遣兵攻羅平復之安應龍走雷益復

分遣袁善施翰李思忠沙源吾必奎等分道討賊
江川通海河西大疫

巡撫閱洪學疏請於粵蜀并開通滇之路以備緩急從
之

傳洪學初奉撫滇之命至武林卽聞黔警隨具通粵
一疏同新按臣駐湘潭候旨久之不得部覆乃從衡
永折而之粵經桂平蒼梧邕潯江而上乃達南寧自
養利入龍英土界由廣南而出臨安至滇省時黔蜀
告訐烽烟孔熾故洪學復上疏此明晰痛切利害曉
然朝議從之洪學字周先烏程人

滇雲歷年傳

卷九

吳

蛇按中原通滇一由黔卽莊躑常頰所通之道也一
由蜀卽司馬遷諸葛亮所入之道也一由粵卽光武
初功曹謝暹與四大姓保境奉貢所出之道也故通
滇之路自秦漢以來三路并行未嘗廢也後世日趨
簡易且蜀道險危粵江瘴癘行者視爲畏途加之朝
覲會同直趨爲便故自元明取道於滇者必指黔中
爲首途而粵蜀因之荒蕪矣洪學此請酌古宜今可
謂經綸天下之大經者已

二月甘露降於大理圓瑩如珠

三月雲龍三崇山鳴如轟雷

設科等復攻嵩明表善沙源擊破之斬其頭目一人首
一百五十餘級科乞降

四月雲南地震傾城郭民居無數

大理地震聲如吼地裂五區

五月建交水城移平夷右所官軍守之

水西普安賊寇平夷參將表善擊敗之遁去

改安寧提舉司爲琅井提舉司駐琅井安寧鹽課附州

徵解

六月定遠大雨震電霧黃紅色水溢溺田禾廬舍死三

百餘人牲畜無算

滇雲歷年傳

卷九

星

廣西府疫

十一月師宗地震

昆明羅漢山崩三十餘丈

有流星大如斗色如火自省城東南隕於西北聲如雷

巡撫閔洪學條奏滇中情狀亟請接濟拯救併請將沐

莊照舊歸有司徵收報聞

疏曰今之爲滇寇也丙夷曰補鮓曰設科曰張世臣

所謂腹心之疾不能一朝安者也外夷曰安効良曰

祿千鍾曰尹王保所謂肘腋之憂朝不保暮者也至

於黔之寇曰水西顧滇門戶在黔滇與黔實共安危

亦不得以門庭之寇作膜外視者也試思此諸寇有一馬不誅鋤戡定滇能安枕乎又思欲平諸寇需幾許兵幾許餉幾許文武將吏而滇有之乎恐禍機猝發東川霑益普安一時雲擾滇必不能四面應接此目前大危也臣亦既徧集士馬以尹起易駐交水以袁善駐平夷以施翰駐越州分兵馬龍以思忠駐羅平徃來師宗又盡發武尋兵之在城者於各隘以金爲貴駐倘甸以名色守備李瑗駐補知令各統一二千多不過三四千苦未足捍大敵而此數萬兵之糧安出乎又檄普安州署印同知劉世龍收拾餘燼逃

滇雲歷年傳

卷九

吳

其精銳成一軍本官領之駐新普之間使東望安南西望平夷相爲呼應以本地官募本地人守本地方食本地米無攜散之勢無匱乏之憂他日滇師大舉因之爲東道至固策之便者而黔路方梗普安之糧不得不按月暫給又安南孤城久困城中至易子而食臣齎千三百金分發賑救爲皇上延此子遺以待恢復乃滇呼呼吸救死不贍又有餘資以給黔乎若不及今將前後題允之餉如數立刻解發文武將吏不亟遴選來滇臣無米必不能炊一手一足必不能撐持雖廟堂之上無棄滇之心乃不幸而有其事

矣皇上未忍棄滇接濟拯救寧待臣詞之畢抑臣猶有請焉朝議以援黔倚重鎮臣將莊田仍歸管業不知援黔者鎮臣自有之心不待賞而加勸其有志而未逮者鎮臣直無如之何又非賞之能勸也滇饑饉之後繼以師旅地方在在殘破人心處處動搖加意拊摩恒慮莫挽奈何更以莊田一事徧騷而駭亂之夫莊田爲滇民患苦其搏噬楚毒之狀前撫臣周嘉謨按臣鄧漢之疏蓋詳言之惟昔太平無事之日不難解之於倒懸今戎馬倥傯之秋何堪再驅諸鼎鑊伏望天語叮嚀將總鎮莊田容有司賒舊徵收以奠滇雲歷年傳

卷九

冕

顛危之疆以成鎮臣之美

市
兵備參議道王英參將尹啟易計擒設科李賢等磔於

四年甲子大理疫

祿勸旱

十八寨地震

廣西廣南春夏不雨

六月麗江地震如雷傾廬舍

七月武定大雨雪損禾

武舉官李瑗奉檄率兵襲張世臣於他頗斬之俘其妻

子武尋平

八月鄉試通省生儒取王适等四十七名

志成進士者楊繩武朱國昌萬民表王凝命龔彝陶

文產按繩武有事功

武定產鷄四翼四足

新化新平賊魯魁魯克等伏深箐劫掠地方巡撫閔洪
學檄分守副使胡其慥遊擊劉崇禮搜捕俘斬餘黨悉
平立十二哨於其地戍之

蛻按此魯魁山野賊之始山爲哀牢之支派跨連郡

邑七八屬本無名以魯魁據此作賊故卽以賊名名

滇雲歷年傳

卷九

卒

其山當日旋起旋滅則地非劇險賊非劇雄可以想
見柰何後之裝點形容者竟似演說水滸傳奇可發
一笑

十二月少傅太子太保黔國公沐昌祚卒

傅昌祚朝弼長子襲公爵平岳鳳加太子太保後乞

休子獻代上以祚有平順大功晉都督繼因武定賊

圍省城祚劾巡撫及獻俱被逮仍起昌祚視事晉少

傅年七十卒

五年乙丑巡撫閔洪學遣吾必奎恢復炎方松林霑益
倘塘四站蜀道復通

三月烏撒安効良入寇袁善督兵力戰却之

滇攷初設科李賢張世臣等已誅檄安効良縛獻安應龍以自贖効良持兩端見賊勢衰陽爲恭順遂以應龍首及烏撒衛所各印來獻勞其使而歸之行至曲靖遇盜被殺効良忿甚時奢崇明被擒於龍里安邦彥亦爲黔撫王三善擊敗逃匿織金聲勢頗振已而三善爲邦彥黨陳其愚所詐被害於大方遂中水西賊復熾効良因以殺使爲辭合邦彥崇明等共爲三十九營直抵霑益袁善督沙源等力戰五日夜却之吾必奎堅守炎方以老賊衆袁善乘勝間出與必

滇雲歷年傳

卷九

至

奎內外夾擊復大敗之賊遁五月効良復糾水西入寇巡撫閔洪學檄布政使謝存仁及袁善等大敗之於馬龍州賊由尋甸遁歸將假道東川東川奉巡撫檄以木塞路不得通有阿遣馬頭竜戈資爲之鄉導從山路遁歸事平厚賞東川購竜戈資縛獻軍門斬之安邦彥等就撫方斯時也兩酋倡亂三省俱被蹂躪而滇更處黔蜀之外道路不通勢亦岌岌矣幸巡撫臨危拮据頗挫賊鋒其後諸酋就撫而滇得偷安西鄙又十餘年乃復有吾沙之禍亂之所生蠹蠹爲之階君子蓋於滇悲之矣

六月以沐啟元爲征南將軍黔國公鎮守雲南

傳啟元昌祚孫獻之子也昌祚卒獻以罪除名元乃

襲爵

七年丁卯秋八月鄉試通省生儒取閔仲侗等四十七

人

志成進士者王士章馬兆義

懷宗崇禎二年己巳總督貴湖雲川廣五省軍務朱爨

元檄滇兵下烏撒合討安賊

綱鑑貴州安邦彥作亂巡撫王三善陷歿遂以朱爨

元總滇黔楚粵蜀五省軍務駐劄貴陽乃檄滇兵下

滇雲歷年傳

卷九

五

烏撒蜀兵出永寧扼各路要害而親帥大軍駐陸廣

逼大方奢崇明號大梁王安邦彥號四裔大長老反

示費小阿烏繼阿鮮怯各號元帥悉力趨永寧先犯赤

水謀知之爨元授意守將許成名佯敗誘賊深入度

賊已抵永寧分遣林兆鼎從三岔入王國禎從陸廣

入劉養鯤從遵義入邦彥分兵四應力不支羅乾象

以復以奇兵繞出其背急擊之賊大驚潰崇明朝彥等

皆被創漢兵斬其首以獻爨元不欲窮兵乃移檄安

位赦其罪許其歸附而位暨子不能自決其群下復

謀合潰兵抗拒爨元乃大會諸將曰水西多山險叢

簣簣蠻烟燧雨莫辨晝夜深入難出以此多敗當與諸君扼其要害四面迭攻漸次盪除使賊乏糧將自斃於是焚蒙翳剔岩穴截溪流發勁卒馳騁百餘里或斬樵牧或焚積聚暮還歸屯賊益不能測凡百餘日所得首功萬餘級生口數萬每得嚮導輒發窖粟就食而賊饑甚劉養鯤遣其客入大方燒其宮室懸榜而出安位大恐乞降燮元爲奏請許之水烏悉平三年庚午征南將軍黔國公沐啟元暴卒

志啟元狂悖無禮與巡按余城有隙城亦凌侮之啟元益甚欲殺余城舉兵將反太夫人宋氏知其謀大

滇雲歷年傳

卷九

三

驚曰吾家累世忠貞原無失德豈因此子敗祖宗臣節乎於是釀毒酒飲啟元中夜藥發死子天波嗣年

十二

蛻按沐氏久鎮雲南擬於親王督撫大僚謁沐氏皆及門下車藩臬以下逡巡爲讓天下久平縉紳士抑貶之萬歷中昌祚出僉事楊寅秋不避道昌祚咎其下人寅秋與昌祚訟於朝朝中之士不能無多求沐氏明旨屢切責云沐氏鎮雲南其卒也皆還葬都門之下所以得用闔其始鎮太祖使閩監焉陵夷用闔人夫世祿之家鮮克由禮而沐氏世無失德代著勳

勞朝廷加以崇禮南人亦不敢輕之承平既久後嗣寢頹至朝弼而功名益衰昌祚碌碌不足重輕楊僉事已藐視之訟而不勝時使然也繼之以狂悖無禮之啟元與撫按滋嫌而余城又直以土司視之橫加凌侮苟非宋太夫人大義滅親豈惟沐氏敗其家門卽雲南萬里生靈先中原而塗炭矣彼余城之肉其足食哉從此而明祚告終天波遠殍抑亦可爲肺腑戚臣與國同其始終存亡者已

秋七月白井大雨水溢壞官民廬舍漂沒人口千餘填塞井路失瀆脈所在

滇雲歷年傳

卷九

番

巡撫王伉巡按甘學潤屯兵曲靖剿安劾良設科餘黨周世昌平之

八月鄉試通省生儒取孫光烈等四十八人

志是科增一名成進士者陳璽

冬阿迷州土酋普名聲反全滇皆震

志初名聲隨御史傅宗龍援黔宗龍畜之於家及巡按余城與沐啟元搆隙陰借名聲爲衛名聲遂生覬覦啟元死乃歸巡撫王伉惡之後寧州祿土官與名聲互訐人傳伉欲剿名聲名聲懼使人詐爲祿土官家丁誣名聲於伉以覘虛實伉果有卽討之言名聲

遂反兵至晉寧欲寇省城刳孕婦卜男臧女否視之
女也賊知其不祥遂回

四年辛未巡撫王伉討普名聲敗績總兵秦宥商士傑
參議周世昌將官朱永吉死之都司任進効全軍皆沒
志初名聲爲馬者哨哨頭水烏之亂與吾必奎沙源
等破賊有功旣而隨傅宗龍援黔及羅龍以內艱歸
名聲亦回授阿迷土知州日益驕蹇與其妻萬氏擁
兵猖獗後巡按御史趙洪範至臨安名聲率兵逐之
戈甲旗幟列數里洪範惡之貽書巡撫王伉謂其養
癰伉亦習聞名聲不法時寧州土官祿滉與名聲互

滇雲歷年傳

卷九

五

許覘知撫按欲剿之遂反伉奏請檄調黔蜀兵會討
以參議周世昌監軍擊名聲敗之進圍阿迷名聲以
重賄誘吾必奎復使其下僞約降王伉以承差莊其
蒞與名聲故交遣往宣諭名聲留飲佯使人告急且
密語左右曰官兵四至皆不慮但從某箐入甚爲可
憂蒞得名聲語歸告伉伉不知爲計遂遣將朱永吉
往攻某箐伏發必奎賣陣先走全師皆陷世昌歿於
陣永吉亦力戰死名聲犯臨安參將温如珍卻之事
聞逮巡撫王伉及御史趙洪範斬莊其蒞於市時名
聲雖戰勝仍巧詞乞撫當道懲前事不復置討總督

至自黔以兵威撫定焉

龍見於石屏之異龍湖鬚瓜鱗甲皆見

記異龍湖在石屏州東有九曲三島小島曰孟繼龍中島曰小末東上島曰大瑞城俗呼曰大水城小水城周自五十里流入瀘江歸閩洞出阿迷州西東會盤江下廣西府於阿迷爲樂榮湖

五年壬申叛賊普名聲死賊妻萬氏領其衆

志初名聲叛其兵頭何天衢反正自効名聲移兵攻之中礮死其妻萬氏遂擁衆據阿迷州萬氏江右寄籍人女佼而兇淫據其衆役使諸小夷復攻天衢天

滇雲歷年傳

卷九

五十六

衢無援食盡舉家自焚當天衢被困數日日求救於

黔國公爲于錫朋所抑以致敗沒於是萬氏知撫鎮

之不足畏而益加強橫矣名聲旣死萬氏得縱其欲

選其下壯而美者更番寢直旣久覺無以服人乃募

贅婿招安南司土官沙源之長子沙定海爲夫定海

椎樸不能得萬氏之歡弟定洲少年有姿色乃更逐

殺定海而贅定洲當事不能問也其子普服遠心懷

不平屢欲殺定洲萬氏乃與定洲別居一寨陽修職

業惟謹其實擁強兵併近夷地愈廣南至交岡是時

中國多故雲南沐黔國天波年幼襲職母陳氏聽信

劣生于錫朋士人饒希之金繼組等網利營私土司
多叛遂致潰疣決痼而不可救藥國亦隨之以亡
蛻按普名聲死於何天衢之礮記載甚是分明乃滇
攷謂廣西府知府張繼孟初到詐檄盛推名聲繼而
徃謁兵憲取道阿迷先示必將晤語又謬過而還歡
欣把臂及執杯疑毒又反暗自下藥俾令明誓自飲
而後乘騎速行名聲藥發追之不及而死言之雖詳
而近於戲且以太守之尊身入虎穴一有不售立爲
糝粉似平賊有道良不必爲此行險僥倖之事也野
語訛傳初無足取馮氏以繼孟後曾諭降萬氏故遂
滇雲歷年傳 卷九 五

採聽不根而書之云爾指爲信史則不然

習晤土酋王顯祖築城新興州北窺伺州城巡按御史
塗必法命毀之

志嶠晤王顯祖新興州北築城已而毀之時顯祖潛
畜異謀築土垣於城北校場控扼要隘窺伺州城士
民憂之會巡按御史塗必法行部經州有諸生奉文
泣陳禍胎浚然其言命毀之州人卧始安席

六年癸酉巡按姜思睿議撫萬氏所遣輒被殺廣西知
府張繼孟單騎入賊營諭以利害萬氏乃降

江川大水湮沒城垣

秋八月鄉試通省生儒取梁甲壯等四十七人

志成進士者陳我德張宣

七年甲戌遷江川縣城

八年乙亥右布政使楊文岳捐築昆陽州城

傳文岳四川南充人有才幹多惠政歷官至兵部侍

郎

九年丙子正月順寧卡思凹夜半地中忽火起方廣數丈餘上升北過枯柯壩隕於沙窩寨後是歲瘴疾大作總督朱燦元通黔滇路

綱鑑燦元既平叛苗水西勢益孤又通上下六衛并

滇雲歷年傳

卷九

五

清平偏鎮四衛道路凡一千六百餘里設亭障置游徼以便往來滇中明年安位死西南悉平位死無嗣族屬爭立朝議欲乘其斃郡縣之朱燦元上書諫乃止燦元招將吏議以爲衆建土司使其勢少力分則易制各欲保土地傅子孫則不敢爲逆乃上奏曰臣按西南之境皆荒服也楊氏反播奢氏反蘭安氏反水西而滇之定番彈丸小州爲長官司者十有七二三十年來未聞有反者非他司好逆而定番忠順也盖地大者跋扈之資而勢弱者保身之策也今臣請以水西之壤授諸渠長及有功漢人咸俾世守凡其

俗虐政苛歛一切除之使參用漢法可爲長久計制曰可西南遂底定焉然食古不化變元之失也

七月順寧龍鬪

八月鄉試通省生儒取潘世澄等四十七人

志成進士者張一甲張垣陳履中

十一年戊寅金滄道王景重修滄麓書院

十二年己卯秋八月鄉試通省生儒取陳達道等四十

七八

志成進士者左廷皋廖履亨嚴似祖龔鼎

十三年庚辰蠻酋王二圍新興州城分守臨元參政程

滇雲歷年傳

卷九

五九

楷知州張尹志擊却之

十五年壬午詔增解額七名

詔贈前川陝總督傅宗龍兵部尚書諡忠壯

傅宗龍字括蒼昆明人萬歷庚戌進士初任四川巴

縣行取浙江巡鹽御史再爲貴州巡按征蠻有功晉

太僕寺卿隨陞薊遼總督兵部侍郎轉戶部以諫言

忤旨罷職崇禎十一年復起四川巡撫尋加兵部右

侍郎後加兵部尚書又以言事下獄十五年陞秦督

征流寇軍潰被執罵賊而死事聞與以贈諡墓在府

西十里棋盤山下按此傳亦稍有互異處姑仍之

八月鄉試通省生儒取俞聯魁等五十四人

蛻按明之鄉試止於此科先是宜興再詔請增解額
七名以市恩於士子故遂有此數然明年癸未尙有
一科會試而五十四人竟無一人成進士者亦異於
曩時之省試矣

十六年癸未夏武定大旱

大鳥集於阿迷州濠田頭足高數尺翼倍之

六月武定府獅山鳴

十一月姚安地震有聲民居傾圮無數

滇雲歷年傳

卷九

李

10601

